

VENDIM
Nr.100, datë 27.12.2006

**PËR MIRATIMIN E RREGULLAVE DHE PROCEDURAVE TË SHKËMBIMIT TË
ENERGJISË ELEKTRIKE**

Në mbështetje të neneve 9 dhe 8, pika 2 germa "1", të ligjit nr.9072, datë 22.05.2003 "Për sektorin e energjisë elektrike", të ndryshuar, Bordi i Komisionerëve të ERE-s, në mbledhjen e tij të datës 27.12.2006, pasi shqyrtoi draftin e rregullave dhe procedurave të shkëmbimit të energjisë elektrike,

VENDOSI:

1. Miratimin e rregullave dhe procedurave të shkëmbimit të energjisë elektrike, bashkëlidhur këtij vendimi.
2. Ngarkohet KESH sh.a. për zbatimin e këtij vendimi.
Ky vendim hyn në fuqi pas botimit në Fletoren Zyrtare.

KRYETARI I ERE-S
Bujar Nepravishta

**RREGULLAT DHE PROCEDURAT E SHKËMBIMIT
TË ENERGJISË ELEKTRIKE**

Neni 1
Autoriteti

Këto rregulla hartohen në zbatim të nenit 3 të ligjit nr.9626, datë 16.10.2006 "Për disa shtesa në ligjin nr.9072, datë 22.5.2003 "Për sektorin e energjisë elektrike"", të ndryshuar.

Neni 2
Qëllimi

Të sigurojë rregulla dhe procedura të thjeshtuara për operime të shpejta, bazuar në një proces konkurrues dhe transparent për realizimin e shkëmbimeve të energjisë elektrike, në rastet kur e kërkon situata energjetike, duke garantuar furnizim të qëndrueshëm të konsumatorëve.

Neni 3
Përcaktime

Në këtë rregullore termat e përdorur më poshtë do të kenë kuptimin:

1. "ERE" do të thotë Enti Rregullator i Sektorit të Energjisë Elektrike, i cili është institucioni rregullator i sektorit të energjisë elektrike.
2. "Shkëmbim i energjisë elektrike" do të thotë kalimi i ndërsjellë në sasi dhe në kohë i energjisë elektrike, si dhe tërësia e veprimeve të kryera në rrethanat e mungesës/tepricës së energjisë elektrike nga kompania publike e gjenerimit në kushtet e një situatë energjetike të paparashikuar në

programin vit/muaj/javë/ditë në avancë. Në kuptim të kësaj rregulloreje, shitja dhe blerja në treg e energjisë nuk përbëjnë shkëmbim të energjisë elektrike.

3. “Situatë energjetike e paparashikuar” është gjendja energjetike që sjell devijime nga programi vit/muaj/javë/ditë në avancë, për shkak të tepricave në prodhim apo dhe mungesave në prodhim ose importin e planifikuar gjatë vitit.

4. “Kandidat” do të thotë një person fizik ose juridik i ftuar për të marrë pjesë ose shpreh interes për të kontraktuar me KESH sh.a. për shkëmbim të energjisë elektrike.

5. “Ftesë për shkëmbim”, dokumenti me anë të cilit KESH sh.a. u drejtohet kandidatëve të ndryshëm e që publikohet detyrimisht në faqen elektronike të KESH sh.a.

6. “Urdhri për kryerjen e procedurave të shkëmbimit”, akt juridik i Drejtorit të Përgjithshëm të KESH sh.a. që përcakton të dhëna të karakterit teknik ekonomik, si dhe përcakton komisionin që do të ndjekë zbatimin e urdhrin.

7. “Oferta”, tërësia e dokumenteve, të dërguara me postë, fax ose dorazi, me anë të së cilës një kandidat i përgjigjet ftesës për shkëmbim të KESH sh.a.

8. “Terma komerciale”, tërësia e elementeve, që kanë të bëjnë me koeficientët e shkëmbimit të energjisë elektrike, kushtet (pikat) e livrimit, trajtimi i humbjeve në tranzitim, si dhe penalitetet për mospërbushjen e detyrimeve kontraktuale.

Neni 4 Zbatimi

Shkëmbimi i energjisë elektrike do të bëhet në rastet e mungesave/tepricave të energjisë, që diktohen nga situatat energjetike të paparashikuara në programin vjetor nga shoqëria publike KESH sh.a.

Nevojat për shkëmbimin e energjisë balancuese dhe shkëmbimi ditor, me qëllim optimizimin e sistemit energjetik, nuk janë objekt i këtyre rregullave.

Neni 5 Parimet e shkëmbimit të energjisë elektrike

1. Shkëmbimi i energjisë elektrike do të kryhet në bazë të parimeve të transparencës dhe të efikasitetit ekonomik, që lidhet jo vetëm me transaksionin e kryer, por me gjithë aktivitetin në tërësi të shoqërisë publike KESH sh.a.

Neni 6 Marrëveshjet e shkëmbimit

Shkëmbimi i energjisë elektrike ndërmjet shoqërisë publike KESH sh.a. dhe shoqërive që ofrojnë energji elektrike për shkëmbim, në kuptim të nenit 3 të mësipërm, kryhet sipas rastit, në përputhje me:

a) marrëveshjet shtetërore të lidhura midis Qeverisë Shqiptare dhe qeverive të vendeve përkatëse;

b) marrëveshjet paraprake ndërmjet shoqërisë publike dhe kompanive që ofrojnë energji elektrike për shkëmbim;

c) marrëveshjet e palëve që rrjedhin nga negociatat korente të shoqërisë publike me shoqëritë (Furnizues/tregtarë të huaj ose vendas ose shoqërive publike të rajonit), që ofrojnë energji elektrike për shkëmbim.

Neni 7 Kërkesa

Për çdo shkëmbim, shoqëria publike KESH sh.a. harton kërkesën me termat përkatës për shkëmbimin e energjisë elektrike. Kërkesa përmban:

- sasinë e energjisë elektrike MW/h;
- grafikun ditor të livrimit;

- kohëzgjatjen e livrimit në ditë/javë;
- periudhat e shkëmbimit (marrje/dhënie).

Neni 8

Miratimi i shkëmbimit

1. Drejtori i Përgjithshëm i KESH sh.a. i propozon këshillit mbikëqyrës të shoqërisë nevojën vjetore për shkëmbimet për situata të paparashikuara. Këshilli mbikëqyrës i miraton ato në programin vjetor të zhvillimit të shoqërisë.

2. Sasia e energjisë elektrike neto e shkëmbyer ndërmjet asaj të dhënë dhe asaj të marrë gjatë një viti nuk duhet të jetë më shumë se 4 % e totalit të furnizimit vjetor të vitit pasardhës. Mbi këtë bazë shoqëria do të veprojë gjatë vitit në mënyrë operative.

3. Këshilli mbikëqyrës do të informohet në mënyrë periodike nga shoqëria për çdo operacion shkëmbimi të kryer dhe do të veprojë sipas kompetencave që i jep statuti.

Neni 9

Procedura e shkëmbimit

1. Në bazë të kërkesës për shkëmbim, Drejtori i Përgjithshëm i KESH sh.a. nxjerr urdhrin për kryerjen e procedurave të shkëmbimit të energjisë elektrike. Urdhri do të përmbajë, të paktën:

- sasinë e energjisë elektrike MW/h;
- grafikun ditor të livrimit;
- kohëzgjatjen e livrimit në ditë/javë;
- periudhat e shkëmbimit (marrje/dhënie);
- komisionin e kryerjes së procedurave të shkëmbimit.

2. Komisioni përgatit ftesën për shkëmbim që u drejtohet në mënyrë të dokumentuar të gjithë shoqërive (furnizues/tregtarë të huaj ose vendas, ose shoqërive publike të rajonit), që ofrojnë energji elektrike për shkëmbim dhe përmban kërkesat e përcaktuara në nenin 7, si dhe termat komerciale të shkëmbimit dhe afatin e dorëzimit të ofertave. Kjo kërkesë publikohet në faqen elektronike të KESH sh.a. në po të njëjtën ditë që u drejtohet shoqërive të ndryshme nga KESH sh.a.

3. Brenda afatit të përcaktuar në ftesën për shkëmbim, komisioni do të pranojë ofertat e kandidatëve të ndryshëm dhe do të lejojë pjesëmarrjen e përfaqësuesve të tyre gjatë njohjes me ofertat. Komisioni do të vlerësojë, jo më vonë se 24 orë nga pranimi i tyre, ofertat e paraqitura dhe do të zgjedhë ofertën më të leverdisshme.

4. Në kushtet e paraqitjes së vetëm një oferte, komisioni do të procedojë me pranimin dhe vlerësimin e leverdisshmërisë së saj për KESH sh.a.

5. Në çdo rast komisioni do t'i paraqesë për miratim Drejtorit të Përgjithshëm një raport përmbledhës të kryerjes së procedurave dhe një analizë të ofertës së përzgjedhur, duke argumentuar leverdisshmërinë e saj.

6. Mbi bazë të raportit përmbledhës të komisionit, Drejtori i Përgjithshëm, jo më vonë se 24 orë nga marrja e raportit përmbledhës, shpall ofertën fituese.

7. Komisioni do të mbajë procesverbal për çdo veprim procedural të kryer në funksion të procedurës së shkëmbimit dhe ka përgjegjësinë për ruajtjen e konfidencialitetit të të gjitha ofertave të marra nga të interesuarit.

8. Brenda një periudhe jo më shumë se 24 orë nga marrja e vendimit për shpalljen e ofertës fituese, KESH sh.a. do të negociojë për lidhjen e kontratës me ofertuesin fitues. Nëse ofertuesi fitues refuzon të lidhë kontratën për shkëmbimin e energjisë elektrike, atëherë KESH sh.a. do të procedojë me negociimin për lidhjen e një kontrate me ofertuesin e radhës.

9. I gjithë dokumentacioni, së bashku me kontratën e lidhur midis KESH-it dhe ofertuesit fitues, do të regjistrohet dhe ruhet sipas legjislacionit në fuqi.

Neni 10

Deklarata e konfliktit të interesave

Pas pranimin të ofertave, çdo anëtar i komisionit do të nënshkruajë deklaratën, me anë të së

cilës shpreh mungesën e konfliktit të interesave të tij me ofertuesit në përputhje me legjislacionin. Nëse një nga anëtarët e komisionit ka lidhje pune apo gjaku me një nga ofertuesit, atëherë kryetari i komisionit do t'i kërkojë Drejtorit të Përgjithshëm zëvendësimin e tij. Deri në emërimin e anëtarit tjetër, komisioni nuk do të procedojë me vlerësimin e ofertave.

Neni 11

Operimi për shkëmbimin e energjisë elektrike

KESH sh.a. modifikon grafikun “muaj/javë/ditë në avancë”, në përputhje me nenet 12, 13, 14 të rregullave të tregut dhe ia paraqet OST sh.a. në përputhje me energjinë elektrike që do të shkëmbehet.

KESH sh.a. do t'i paraqesë OST sh.a. të gjitha marrëveshjet e shkëmbimeve.

OST sh.a. do të marrë të gjitha masat për zbatimin e grafikut të modifikuar “muaj/javë/ditë në avancë”.

Neni 12

Rishikimi

Këto rregulla janë objekt rishikimi, me vendim të Bordit të Komisionerëve, sipas rregullave të praktikës dhe procedurave të ERE-s.

Neni 13

Hyrja në fuqi

Këto rregulla hyjnë në fuqi menjëherë dhe botohen në Fletoren Zyrtare.